



Predigt vom 30. Juni 2024 David und Goliath (1. Samuel 17)

Pfrn. Barbara Stankowski

Liebi Gmeind,

Mängisch gwinnt dr Chlyy gäge gross. So wie geschter ar Euro d Schwiz gäge Italie. Aber wenn mir ehrlech si, de müesse mir gloub scho feschtstelle, dass sech sehr viu hüüfiger die Starche, die Lute oder ou die Rücksichtslose düresetze. Sigs ire Schuelklass, im Bruef, ir Wirtschaft oder ou ir Wältpolitik. Und natürlich gwinnt ou im Sport viu hüüfiger dr Favorit aus dr Ussesiter. Dr biblisch Siig vom David übere Goliath isch ender e Usnahm.

Unsere unsichtbaren Riesen

Dr David het es Problem miteme Riis gha. Und ou i üsne Läbe chunnt's vor, dass mir vor Riese-Problem stöh. Was si d Riese i üsem Läbe? Wie gseh sie us? Was mache sie? Und wo traffe mir se a?

Üsi Goliats chöme nid mit Schwärt und Rüschtig. Und sie stöh üs ou nid ufeme Bärgkamm gägenüber. Üsi unsichtbare Riese stöh am Morge im Büro und mache's üs schwär afa z'schaffe. Üsi Riese stöh im Schlafzimmer und roube üs dr Schlaf. Oder se stöh im Wohnzimmer und löh üs einsam fühlere oder sie verleite zum Strit mit dene, wo ouno im Wohnzimmer si. Üsi Goliats chöme i Gestalt vo Mönsche und Asprüch, wo mir nie chöi grächt wärde. Sie wädle mit Rächnige, wo mir nid chöi zahle oder mit Erwartige, wo mir nid chöi erfülle. Üsi Riese plage üs mit ere Vergangeheit, wo üs nid loslaht oder mit Sorge um d Zuekunft, wo üs dr Schnuuf näh. Sie chöme i Form vo Chrankheite, Zwiifel, Ängscht, Stritt und Konflikte, i Form vo Brüuch oder Enttäschige, wo mir uf üsem Läbeswäg erläbt hei, vo Schuldgefuehl oder zerbrochene Tröim, wo weh tüe.

Was für Riesen typisch ist

D Gschicht vom David und em Goliath zeigt, was typisch si für Riese. Dr Goliath het es paar Eigeschafte, wo ou für üsi unsichtbare Riesene im Läbe gälte:

- Riese si riesegross und hei viu Chraft. Me cha se nid eifach ignoriere. Sie si da und sie näh Ruum i.
- Riese schüchtere i und si näme ou immer nöii Alöif zum üs fertig z'mache.
- Riese hei Waffene bi sech, wo se unbesiegbar löh la erschyyne
- Sie Läschtere Gott, indäm sie säge, dass Gott üs nid cha häufe.
- Riese mache Ängscht. Wo dr David drzue chunnt, isch d Ängscht vorem Goliath im Volk Israel nümme nöi. Es heisst, dr Goliath heigi 40 Tag lang jede Morge und jede Abe ihne droht. Jede Morge, jede Abe – auso genau denn, wo

d Israelite zu Gott hei bättet. Das isch sehr gemein. Mit sine Drohige isch är inegrätscht id Beziehig vo de Mönsche zu Gott. Är het se abhalte drvo uf Gott z'luege und d Angscht isch verständlecherwys immer wie meh gwachse. Und ig gloube, das mache üsi Riese hüt ouno. Sie grätschte dri i üsi Gottesbeziehig.

Näb söttige Riese und Rieseproblem fühle mir üs schnäu mau wie Zwärge, chli und hiuflos und wie glähmt.

Wie reagieren wir auf unsere Goliats?

Aui die Wäsenszüüg vom Goliat hei drzue gfuehrt, dass d Israelite si gsi wie glähmt. Keine het sech trout, gäge ihn z'kämpfe. Aui hei nume sini Chraft und Sterchi gseh. Dass sie gäge ihn chönnte gwinne, halte sie aui für unmüglech. Lieber hei sie sech Tag für Tag vo ihm la verspote. Nume eine het kei Angscht zeigt – dr David. Tusigi vo Soldate hei sech verchroche, nume dr Hirtebueb isch parat gsi zum kämpfe.

Ig cha die Angscht vor Mehrheit guet verstah. Ig ghöre ou zur Mehrheit, wo lieber dr Chopf zieht und hofft, dass dr Goliath villicht gliich vo säuber eifach verschwindet.

Mängisch verschwinde Riese würklech wieder us üsne Läbe. Mängisch git's es ou, dass Riese chliner wärde, wenn mir üs ihne stelle. Villicht kennet dir d Gschicht vom Jim Knopf. Es git dort e wunderbari Stell, wo dr Jim Knopf und dr Lukas ir Wüeshti emne Schiin-Riis begägne. E riesegrosse Maa, wo furchtflössend usgseht. Aber je necher dass sie ihm chöme, desto chliner wird är, bis är am Schluss ganz e normali Grössli het. Das gits ou im Läbe: mängisch isch es Riese-Problem gar nümme so riesig, wenn mir üs ihm stelle. Aber dr Goliath isch nid e Schiinriis gsi. Ir Bibel steit nid: «Und siehe, als David sich Goliath näherte, wurde Goliath ganz klein.» Dr Goliath isch gross blibe, so wie o i üsne Läbe deu Riese eifach Riese blibe.

Vom David chöi mir lehre, wie mit so Riese umz'gah. Är isch dr einzig, wo sech nid laht la gfange näh vor Angscht und vor Erschiinig vom Goliath. Är findet nach langem Hin und Här e Waffe gäge Goliath. Sisich nid e Rüschtig, nid es Schwärt – au das isch nid sis. Är cha sech i dere Rüschtig ja nid mau bewege. Aber wär gägne Riis wott kämpfe, muess bewegele si. Es brucht e Momänt bis är merkt, was sini Art zum Kämpfe isch: d Steischlöidere und fuf Chiselsteine. Steine, wo är gezielt gäge Goliath spickt und drmit dä Riis zum umgheie bringt. So eifach isch es.

Was sind deine Kieselsteine?

Und drum isch d Frag im Blick uf üses Läbe: was si mini egete Chiselsteine, wo ig cha id Hand näh, zum mini Riise ds verschüüche? Ig ha fuf Steinli hüt drbi und möcht mit öich teile, was für mi so Chiselsteine chöi si und was ig vom David cha lehre:

Gottvertrauen: Dr erscht Chiselstei isch bim David sicher sis Vertraue i Gott. Dr David weiss, dass är nid eleini vorem Goliath steit. Dr Goliath kämpft mit mönschleche Waffe und mönschlecher Sterchi. Dr David drgäge rächnet mit dr Chraft vo Gott. Är

erinneret sech a aui die Mal, wo Gott ihm scho ghulfe het und vertraut druf, dass Gott ihm ou ize hiuft.

Das dörfe ou mir wüsse, wenn mir üsne Goliats gägenüberstöh: Mir si nid elei. Uf üsere Site kämpft öpper, wo viu stercher isch aus aues andere.

Gäuit, dass Gottvertroue ire Predigt grad aus erschts chunnt isch klar. Das isch die «korräkti christlechi» Antwort: Vertrau uf Gott und aui dini Problem wärde glöst. Bim David gseh mir aber, dass das natürlech nid so eifach isch. Mit Gottvertroue elei isch dr Goliat nid besiegt worde.

Entschlosseheit: Dr David het em Find när scho säuber müesse entgägeträtte und ihm id Ouge luege. Är het sech uf dä Kampf müesse ilah. Är het säuber müesse aktiv wärde. Är het d Entschlosseheit brucht zum Handle. Das isch e zwöite Chiselstei. D Konsequänz vom Gottvertroue isch nid, eifach d Händ i Schoss ds lege und ds warte, sondern dass mir üs entschlosse däm Riis stelle, wo üs wott ischüchtere. D Konsequänz vom Gottvertroue isch nid, dass Gott aues macht, sondern dass mir muetig und entschlosse gnueg wärde, zum säuber öppis ds mache.

Selbstvertrauen: E dritte Chiselstei geit i die gliichi richtig: sisch ds Sälbschtvertroue. Dr David het nid nume Gott müesse vertroue, sondern ou sich säuber. Är het sine Fähigkeite müesse chönne vertroue. Är het müesse wüsse, was är guet cha – mit dr Steischlöidere umgah – und när het är müesse gloube, dass är das würklech guet cha. Wenn är dra zwiiflet hätti, het är verlore. Bim David isch Gottvertroue und Sälbstvertoue ufne spannendi und chraftvolli Art mitenand verwobe. Ja, är het Bäre und Löie tötet. Aber är weiss, dass är das nume het chönne, wiu zu sire Gschicklechkeit, sire Entschlosseheit und sim Muet ou no Gottes Schutz isch drzue cho. Und so isch es ize ou bim Goliat: Gottvertroue eleini hätti chuun glängt. Sälbstvertroue eleini ou nid. Aber beidi mitenand hei dr Goliat besiegt.

Das isch ou wichtig für üs im Kampf gäge üsi Goliats. Mir müesse üsi eigete Sterchine entdecke: was chani guet? Wo bini im Vorteil? Wenn mir nume uf üsi Schwachpunkte luege, verlüre mir dr Muet und d Riise hei es liechts Spiel. Wenn ig aber realistisch cha ischetze, was ig cha und was nid, de chöi mir em Riis entgägeträtte. Drum isch Säubschtvertroue, ds Vertroue i die eigete Sterchine ou sone Chiselstei.

Gmeinschaft mit andere: E witere Chiselstei isch d Gmeinschaft. Dr David isch alleini gsi. Bi ihm isch es ou eso gange. Aber bi üsne Riese isch es guet, wenn mir Lüt mit is Boot hole. Wenn mir ihne vo üsne Riise verzelle – mängisch macht das elei scho e Riis viu chliiner. D Gmeinschaft, ds Miteinand unterwägs und ds zäme bätte si isch ganz e wichtige Chiselstei.

Sterchig dür d Bible: Ou d Wort us dr Bible chöi e Chiselstei si, wiu sie stercher si aus ds Destruktive, wo Riese üs säge und wiu die Wort üs sterche und ermuetige.

Es git no viu meh, wo zu Chiselsteine chöi wärde. Jede Mönsch muess für sich säuber usefinde und ou usprobiere, weli Chiselsteinli das ihm am meischte häufe, gäge sini Riise. Wenn mir gäge üsi Riese wei kämpfe, de müesse mir gueti, für üs passendi Chiselsteinli id Hand näh. Villicht sis nid fuf, villicht bruche mir viu meh. Villicht längt ou scho eis oder zwöi. Aber mir wärde nume gäge Riis acho, wenn mir öppis ir Hand hei.

Mir müesse ou nid eleini gäge Riese kämpfe. Gott weiss wie's isch, wenn mir Riese gägenüber stöh. Ou Jesus het müesse erfahre, wie das isch, wenn me emne Riis gägenüber steit. Är isch starch unger Beschuss gsi. Im Garte Getsemane het är schrecklechi Ängscht usgstande. Jesus weiss um üsi Kämpf und um d Bedrohig, wo Riise chöi ihnäh. Und Gott kämpft mit üs.

Langi Zyt nachem Kampf gäge Goliat het dr David im Psalm 18 gschribe und villicht dr Kampf gäge Goliat im Hinterkopf gha. Dä Psalm 18 dörf dir gärn deheime für öich läse aus Ermuetigung für öii Kämpf gäge Riese. Aber ig wetti em David ds Schlusswort gä vo dere Predigt. Är seit im Psalm 18 ide Värse 29 und 30:

***Du gisch mire Lampe Liecht, dr Herr, my Gott, macht mini Fyschteri häll.
I dyre Chraft gumpe ig über alli Züün. Mit mym Gott springeni über Muure.
Amen.***

Segen

Geht in der Kraft, die euch gegeben ist:
Geht einfach, leichtfüssig und zart
Haltet Ausschau nach der Liebe.
Gottes Geist geleite euch.

Der Herr segne dich und behüte dich
Der Herr lasse sein Angesicht leuchten über dir und sei dir gnädig
Der Herr erhebe sein Angesicht auf dich und gebe dir seinen Frieden!
Amens